

■ COMMENTARI OSPITANT

In onn plain eveniments va a fin...

Ina retrospectiva da la presidenta da la regenza grischuna 2017

DA BARBARA JANOM STEINER,
PRESIDENTA DA LA REGENZA

Las lingias grossas èn stadas marcadas da temas sco «alternative facts» da l'elita da Trump, tests provocatifs da rachetas dals Coreans dal nord, terrur sin l'entir mund ed er en Europa, elecziuns dals parlaments en noss pajais vischins. In tema impurtant per tuts: la digitalisaziun. Roboters, vehichels autoguidads, schanzas e ristgas per il mund da lavour èn vegnids discutads er tar nus en moda intensiva gia ditg avant che l'emprim Di digital svizzer saja vegnì annunzià.

Qua tar nus, en noss chantun, è vegnida refusada clera main ina contribuziun a la candidatura per ils Gieus olimpics. Il siemi da l'Olimpiada è pia spirà per in temp pli lung. Percunter è il svilup dal curs da l'euro, ch'è s'augmentà dal cumentzament d'avust da stgars 1.05 ad en il fratemps 1.17 francs, stà legraivel per il turissem e permetta pia da spetgar meglras cifras. Conternads avain nus stuì vesair ils 24 d'avust ch'ina gronda quantitat da grippa è sa distatgada dal Piz Cengalo en la Bregaglia ed è

ramplunada aval. Ina lavina da glitta d'ina dimensiun nunimaginabla è arrivada fin tar la via principala a Bondo ed ha cuvrì parts dal vitg per meters. Las abitantas ed ils abitants dal vitg han pudì sa salvar a temp, otg viandants esters han pers la vita. Quest eveniment tragic ans ha puspè ina giada mussà quant vulnerabels che nus esan... ma er co che nossas forzas d'acziun funcziunan bain e prestan lavour excellenta e co che la solidaritat sa manifestescha en noss pajais – quai fa bain.

Sco presidenta da la regenza dastg jau er guardar enavos sin blers muments commovents e sin blers inscunters interessants. Uschia hai jau gi l'occasiun da visitar tut las regiuns resp. lur conferenzas dals presidents per in barat d'ideas informal, suenter che la refurma dal territori è vegnida realisada cun success. Il facit è dal tut-tafatg positiv. La refurma ha pudì vegnir realisada praticamain senza problems, grazia als responsabels al lieu – nossas indesch regiuns funcziunan ed èn prontas per dumagnar las sfidas futuras. Nossas refurmazas da las structuras cun uss er ina nova lescha da vischnancas e



cun ulteriurs projects da fusiun sco er cun lur finanziazion grazia ad ina nova gulivaziun da finanzas èn sin buna via, e nossas finanzas chantunals èn anc adina equilibradas e quai anc adina senza program da spargn, dentant cun ina disciplina rigurusa tar il budget. Sin plaun naziunal hai gi num da

defender ils interess da noss chantun en differentas conferenzas, particularmain en la conferenza da las regenzas chantunals ed en la conferenza da las directuras e dals directurs chantunals da finanzas. Cun success ha pudì vegnir spustada ad interim la discussiun davart ils tschains d'aua. En connex cun temazs zunt impurtants sco la gulivaziun da finanzas naziunala e la refurma fiscale SV 17 avain nus pudì far valair noss interest per entant cun success a la testa da differentas gruppas da lavour. La discussiun davart quests temazs n'è betg anc terminada e vegn a cuntinuar cunzunt l'onn proxim cun stuair prender decisiuns impurtantas. En il decurs da l'onn avain nus pudì retschaiver bleras visitas uffizialas, uschia per exemplu ambasaduras ed ambassadurs da l'Italia, da la Germania, da l'Austria, da la Finlanda, da la Svezia, da la Norvegia sco er da la China. Quests discurs èn elements impurtants da las relaziuns externas dal chantun. Talas visitas servan en emprima lingia a barattar experientschas sin il champ cultural, economic e politic. Er han gi lieu scuntradas cun las regenzas dal Principadi da Liechtenstein, dal Tirol dal sid sco

er dal Vorarlberg, a chaschun da las qualas nus avain discutà du mondas specificas actualas e projects concrets transconfinais. Adina puspè fascinanta è la diversitat incredibla d'occurrenzas distinguidas che vegnan purschidas en noss chantun. Il Forum economic mundial a Tavau, quest onn cun la visita impressiunanta dal president da stadi da la China Xi Jinping, il Maraton engiadinal u la Festa federala da lutga a Tavau, per numerar mo in pèr da las occurrenzas. Degns da vegnir menziunads ed in punct culminant absolut èn stads senza dubi ils Campionadis mundials da skis a San Murezzan che han preschentà noss chantun sin plaun internaziunal en la meglia glisch. Impressiunanta è stada ina giada dapli la prestaziun excellenta da tut ils voluntaris. Senza quella na pudessan ins strusch realisar tals eveniments gronds. Lur motivaziun, lur engaschi e lur optimissem ans duessan esser in exemplu per schliar cuminaivla main las sfidas futuras.

En quest senn giavisch jau a Vus per l'onn nov tut il bun, cuntentientscha e bainstar, cuntinuant buna sanadad!